

Hobennan mes lo por nombra edificio di nobo di MFA



ORANJESTAD – Hobennan mes lo haya oportunidad pa nombra e edificio nobo di Multi Funcionele Acomodatíe (MFA) cu ta kedando cla Noord. Lo tin un competencia entre studiantenan di scol secundario pa asina por scoge un nomber pa e edificio aki.

Segun un comunicado di prensa, di gabinete Eman, director di MFA, esta Anky Vrolijk a splica cu ta hayando un reaccion masha positivo for di cabesante y docentenan. E prome stapnan di e iniciativa aki a cuminsa for di aña pasa na momento cu representantenan di MFA a acerca varios scol basico na Noord. Percurando pa tur

e muchanan haya mes tanto chens, a acudi tanto na e scolnan publico, como esunnan priva. Pa motibo cu ta trata di un proyecto caminda e muchanan mester haci investigación, a opta pa laga e hobennan di klas 5 y 6 so participa. E oficina di MFA ta hayando asistencia di Instituto di Cultura den e organización di e competencia.



Chikito y grandi

“E idea ta pa nan bay cas y puntra nan mayornan y welo y welanan y asina conoce mas di e historia y cultura di e bario,” sra. Vrolijk a splica. “E edificio ta uno multifuncional, kier men pa tur hende den e famia.” Segun e comunicado.

Algun criterio ta importante pa sigura cu e nomber scogi ta representa e bario su identidad. Pa e motibo a pidi pa bin cu nombernan basa riba e herencia y historia, flora of fauna, personahe historico of palabra crioyo.

Tambe e nomber mester ta na Papiamentu y no por ta un nomber cu ya a wordo uza pa otro edificio caba. E team di MFA hunto cu Instituto di Cultura ta bay haci

e seleccion final pa bin cu e nomber ganado. Esaki ta bay keda anuncia den transcurso di proximo lunanan. E premio ta pa e klas completo y ta consisti di un evento cultural caminda e muchanan por disfruta, pero cu na mesun momento nan por siña di e cultura di Aruba.

Tambe sra. Vrolijk a confirma cu e idea ta pa haci un competencia mescos cu tur otro MFA pa asina involucra e bario den e proyecto y su desaroyo. Ta bay tin mester di un nomber pa e MFA di Paradera, Santa Cruz, Savaneta y San Nicolas. Ademas di e nomber ganado den cada bario, tambe ta bay dedica e edificio na un habitante como honor pa su contribucion na e desaroyo y bienestar di e bisindario. □